

KAMPUS

Kita juga ada cerita

DERITA MAHASISWA



Hangat diperkatakan sejak akhir-akhir ini tentang isu mahasiswa tidak cukup makan. *Sinar Harian* dalam laporan pada 14 Januari lalu juga turut memaparkan perkara yang sama melalui kajian dijalankan Pertubuhan Sukarelawan Muslim Malaysia (MVM). Hasil kaji selidik itu mendapati 18,675 atau 75 peratus daripada mahasiswa menyatakan mereka tidak berduit untuk makan.

Presidennya, Muhammad Jantan memberitahu enam universiti memberi

respons antaranya, Universiti Teknologi Mara (UITM), Universiti Malaya (UM), Universiti Islam Antarabangsa Malaysia (UIAM), Universiti Kebangsaan Malaysia (UKM), Universiti Utara Malaysia (UUM), dan Universiti Tun Hussein Onn Malaysia (UTHM). Didapati 11,120 mahasiswa makan nasi bujang kerana masalah kewangan.

Dari pihak kementerian pula, Menteri Pendidikan Tinggi, Datuk Seri Idris Jusoh mengarahkan setiap universiti awam kenal pasti pelajar yang menghadapi masalah kewangan untuk dibantu.

"Saya faham ada pelajar yang malu ataupun tidak pasti di mana untuk

mendapatkan bantuan. Ada juga yang menggunakan wang Pinjaman Tabung Pendidikan Tinggi Nasional (PTPTN) untuk membantu keluarga," kata Idris.

Secara keseluruhannya, universiti awam (UA) dan institusi pendidikan tinggi swasta (IPTS) hinggalah ke politeknik dan kolej komuniti, amat prihatin dan komited membantu meringankan beban yang dibadapi mahasiswa.

Di Universiti Putra Malaysia (UPM), pelajar dan warga kerja boleh mendapatkan makanan percuma di *freshshop* UPM. Sumbangan daripada orang ramai juga turut dialu-alukan.

Tahun lalu, seramai 6,813 mahasiswa bekerja sambilan di UA bagi menampung kos sara hidup, di samping menimba

pengalaman kerja.

Idris juga turut berkongsi pengalaman kerja waktu belajar.

"Teringat masa belajar dulu, pernah kerja di stesen pam minyak, di Dominos Pizza sebagai *delivery boy*, dan di Country Club sebagai *jockey* kereta.

"Saya kerja untuk dapat duit tambahan bagi membiayai kehidupan dan keluarga. Sememangnya, kerja sambil belajar adalah cabaran. Namun, dengan pengurusan masa yang baik, ia menjadi satu pengalaman berharga," katanya.

Ikuti kupasan lanjut *Derita Mahasiswa di Isu Kampus*

LIHAT HALAMAN 4 & 5